

Promover il turissem e proteger il clima

Das moziuns pretendan in program d'impuls per la sanaziun d'hotels ed auters alloschis en las regiuns muntagnardas

DA MARTIN CABALZAR

■ **Numerus hotels, pensiuns ed auters alloschis en regiuns turisticas muntagnardas e periferas fan quitads per lur avegnir. Savens manca il chapital necessari per far las investiziuns necessarias, cunzunt era talas per meglierar l'effizienz energetica. Era las bancas èn fitg resalvadas enten conceder credits da sanaziun correspundents.** Quest malesser è lu era stà la raschun principala per ils dus parlamentararis socialdemocrats *Silva Semadeni* (ps GR) e *Hans Stöckli* (ps BE) d'inoltrar ina moziun cun formulaziun identica al cussegl federal. Quel ha dentant recumandà al parlament da refusar la moziun dals dus parlamentararis socialdemocrats.

Das mustgas cun ina frida

Blers manaschis d'alloschi en regiuns turisticas fetschian gronds pissers per lur avegnir, accentueschan ils dus moziunaris. La consequenza da la mancanza da chapital per far las investiziuns necessarias saja che blers manaschis stoppian serar u renunziar a sanaziuns energeticas. Quai saja turisticamain na giavischavel e na correspundia betg a las finamiras da la strategia d'energia. «Il dumber d'hotels tschessa ed ils posts da lavur en la hotelaria ed en la gastronomia sa reducechan», resumeschian ils moziunaris las consequenzas.

Gronds edifizis sco manaschis d'alloschi d'vran fitg blera energia per stgaurdar, cunzunt en las regiuns alpinas nua che las temperaturas èn fitg bassas gist en la stagiun principala d'enviern. I fetschia perquai senn d'investar resp. sustegnair investiziuns sin quest sectur.

Tenor ils dus moziunaris pudess la confederaziun pigliar cun in program d'investiziuns limità al temp «duas mu-



Cun lur moziun identica per in program d'impuls per la sanaziun d'hotels vulan cussegliera nazionala **Silva Semadeni (ps GR)** e **Hans Stöckli (ps BE)** promover il turissem ed en il medem mument era proteger il clima.

FOTOS MAD

stgas cun ina frida», numnadamein promover il turissem e proteger il clima. La moziun correspundia uschia tant a la strategia d'energia da la confederaziun sco er a sia finamira da sustegnair il turissem alpin.

Il cussegl federal refusa la moziun

Il cussegl federal n'ha dentant betg vull acceptar la moziun. El è dentant cunscient ch'ìls manaschis d'alloschi ston investar permanentamain bler per restar cumpetitivs. En vista a la concorrenza sin il martgà turistic internaziunal e considerond las mudestas perspectivas da rendita sajan las investiziuns en l'infrastructura ina gronda sfida per manaschis d'alloschi en valladas muntagnardas. Perquai

sustegnian la confederaziun tals manaschis indirectamain sur l'Associazion svizra per credits d'hotel. Quella instituziun conceda numnadamein a moda subsidiara emprests per cundiziuns favuraivlas a manaschis d'alloschi en regiuns da turissem definidas ed en lieus cun bogns curativs. Projects spezialmain digns da promozion pon plinavant vegnir promovids supplementarmain cun tschains reducids. Tar tals projects tutgian cunzunt era tals per meglierar la persistenza energetica.

Gia impundi meds considerabels

Per pudair ademplir sia incarica legala ha l'Associazion svizra per credits d'hotels a disposiziun annualmain in emprest sen-



za tschains da radund 136 milliuns, in chapital da dotaziun da radund 28,4 milliuns sco era reservas e gudogns da radund 16,4 milliuns. Ultra da quai è vegnì mess a disposiziun a la medema organizaziun l'onn 2011 in emprest supplementar da 100 milliuns ch'è vegnì prolungà 2015 preventivamain fin 2019. Per la fin da 2019 vegn la cumpart da quest credit supplementar che n'è fin alura betg vegnì duvrà – probabel en l'import da radund 30 milliuns – a vegnir restitui l'onn proxim a la confederaziun.

Contribuziuns per projects d'energia

Gia dapi intgins onns pon projects d'energia che correspundan ad in standard d'effizienz energetica exemplaric vegnir

sustegnids cun contribuziuns parzialas da CO₂ en il rom dals programs da promozion dals chantuns sin il sectur d'energia. Per l'onn current en previds radund 396 milliuns per quest intent. Da quels pon era manaschis d'alloschi profiter.

«In program da la confederaziun specificamain per sanar ils manaschis d'alloschi en regiuns muntagnardas cunterfagess a la repartiziun vertenta da las incumbensas tranter confederaziun, chantuns e vischnancas», manegia il cussegl federal. El manassia plinavant ad ina cumplaziun da cunfinar las singulas incumbensas e cumpetenzas e chaschunas sia probabel era duplicitads en la promozion.

Realisaziun da la strategia turistica

Sin fundament da las sfidas permanentas e da las midadas frequentas en il turissem examinescha la confederaziun permanentamain l'effizienz da las mesiras pridadas. En quest connex vegnia era fatg en il rom da la realisaziun da la strategia turistica dal november 2017 in inventarisaziun da la promozion d'investiziuns. En quest connex duain era las mesiras da promozions actualas sco er eventuals models da promozion futurs vegnir elavurads ed examinads. En il rom da questas lavurs duai er il svilup futur a vista media e lunga vegnir examinà, er en il rom dal program da la perioda da legislatura 2020–2023.

Per quests motifs considerescha il cussegl federal in pogram d'impuls temporarmain limità per la sanaziun d'alloschis en regiuns alpinas actualmain per betg opportun.

Il cussegl dals chantuns è d'auter avis e vul tutina prender sut la marella las mesiras proponidas dals moziunaris en la cumissiuon d'economia e taxas per alura tractar definitivamain la moziun en il plenum.